

摘藻堂四庫全書薈要

集部

欽定四庫全書會要

集部

聖祖仁皇帝御製文二集卷十二

十五

詳校官原任編修臣徐立綱

欽定四庫全書薈要

聖祖仁皇帝御製文第二集卷十目錄

勅諭

諭戶部

諭大學士伊桑阿阿蘭泰學士邁圖西安南塔

海傳繼祖

諭大學士伊桑阿阿蘭泰王熙梁清標張玉書

學士邁圖博濟傳繼祖王國昌年遐齡彭孫



適王尹方

諭大學士伊桑阿等

諭大學士伊桑阿阿蘭泰學士邁圖西安博濟
傳繼祖王國昌年遐齡

諭內閣

諭戶部

諭戶部

諭內閣

諭內閣

諭內閣

諭內閣

諭內閣

諭吏部

諭內閣

諭戶部

諭禮部

諭大學士伊桑阿阿蘭泰學士滿丕圖納哈思
格則德珠王國昌理藩院尚書額爾赫圖署
侍郎事學士達瑚

諭戶部

諭戶部

諭內閣

諭兵部

欽定四庫全書薈要卷一萬三千三十八集部

聖祖仁皇帝御製文第二集卷十

勅諭

諭戶部

八旗甲兵國家根本當使生計充裕匱乏無虞向因剿除三逆久歷行間製辦軍器購送馬匹兼之戶口日增費用益廣以致物力漸絀稱貸滋多朕每念及深爲軫惻若不大沛恩施清完夙逋將愈至困迫難以資生今

八旗滿洲蒙古護軍校驍騎校及另戶護軍撥什庫馬
甲併子幼或無嗣寡婦老病傷殘告退人等家下馬甲
所有積債爾部動支庫銀給還漢軍每佐領各給銀五
千兩令其償還債負外餘者各該都統收貯以備公用
其口外駐牧八旗察哈爾兵丁出征隨圍凡有差使一
同効力向竝未給錢糧亦屬可憫嗣後察哈爾護軍校
驍騎校護軍撥什庫著月給錢糧各二兩甲兵及執事
人竝太僕寺牧廠人役著月給錢糧各一兩俟其贍足

時停支爾部卽遵諭行特諭康熙三十年二月十七日

諭大學士伊桑阿阿蘭泰學士邁圖西安南塔海

傳繼祖

盛京官屯五十所沿邊丁壯設爲屯二十五所遷移於
烏喇念此莊屯及沿邊丁壯居住年久已成聚落今遽
令遷移如此衆多人戶生業蕩然必致苦累仍留於盛
京與遷移於烏喇皆公家之屯其爲納賦則一也朕意
此莊屯應停其遷徙於烏喇兵丁每歲派三百名耕種

或一歲以烏喇之兵一歲以捕牲之人輪年耕種亦可
以積穀矣此事所關綦重著學士麻爾圖馳驛往盛京
烏喇令將軍副都統各部堂官悉喻朕意伊等之意若
何詳議回奏康熙三十年二月十八日

諭大學士伊桑阿阿蘭泰王熙梁清標張玉書學
士邁圖博濟傳繼祖王國昌年遐齡彭孫適王
尹方

河道所關重大凡修築濬治必速竣厥工斯有裨益冬

則以沍寒凝凍春則以桃花水發夏秋則又以水澤漲
溢難於興工屢請展限是週歲無可經營之日矣毛成
舖地方最要理宜剋期完工工部不行詳察草率朦混議
展限三月殊屬未審可以此嚴諭尚書席珠河務工程
若如此怠緩萬一泛漲衝決致壞河道汝能任此咎乎
爾衙門竝記之康熙三十年五月二十六日

諭大學士伊桑阿等

喀爾喀原係進貢之國伊等不和知其必敗曾特遣大

臣諭令和好後乃渝好與厄魯特構戰窘迫來歸屢失
生業窮困已極朕以好生之心撫綏養育曲盡周詳因
此懇切抒誠願同四十九旗一例蓋理所必然且比年
來旱澇頻仍民生猶未蘇息風俗猶未醇厚奢靡猶未
盡止朋黨猶未悉除彼此援引傾害猶未屏絕理應日
益圖新時加黽勉君臣殫心竭力尚恐不逮居然以爲
至治遽受尊號斷爲不可所奏已知之康熙三十年五

月二十七日

諭大學士伊桑阿阿蘭泰學士邁圖西安博濟傳

繼祖王國昌年遐齡

黑龍江松花江接壤之地彼處附近所居根奇勒諸姓
中原有可披甲之人應酌量令其披甲駐防遣滿洲兵
八十人往彼教訓之齊七喀爾地方以索倫達呼里之
衆酌量令其披甲駐防遣滿洲兵二百人往彼教訓之
伊等居址附近亦心樂披甲如此則既無遠徙之苦亦
不致需用糗糧矣可以此詢問都統巴海令理藩院集

議政諸臣會議以聞康熙三十年六月十六日

諭內閣

戶部差年壯司官一員令馳驛至直隸巡撫處詳悉詢問畿輔所屬地方雨澤曾否霑足蝗蝻較前何如還奏康熙三十年六月二十二日

諭戶部

朕頃巡行邊外入喜峰口見有民間田畝爲蝗蝻所傷又聞榛子鎮及豐潤等處地方被蝗災者亦所在間有

秋成失望則糧食維艱朕心深切軫念儻及今不爲區
畫儲蓄恐至來歲不免饑饉之虞著行該撫親歷直隸
被災各州縣通加察勘悉心籌畫應作何積貯該撫詳
議具奏其被災各地方明歲錢糧仍照例催科小民必
致苦累著俟該撫察報分數到日將康熙三十一年春
夏二季應徵錢糧緩至秋季徵收用稱朕體恤民生休
息愛養至意爾部卽遵諭行特諭康熙三十年九月十

八日

諭戶部

朕孜孜圖治軫切民依閭閻耕穫時勤諮訪其有以荒
歉上聞者或蠲或賑旋即施行務令得所念河南一省
連歲秋成未獲豐稔非沛特恩蠲恤恐致生計艱難康
熙三十一年錢糧著通行蠲免並漕糧亦著停徵至山
西陝西被災州縣錢糧除照分數蠲免外其康熙三十
一年春夏二季應徵錢糧俱著緩至秋季徵收用稱眷
愛黎元撫綏休養至意爾部即遵諭行特諭康熙三十

年九月十九日

諭內閣

各省副將及以左都督授世職之參將并先經引見者
徵取五人來京或一人至或二人至即奏聞召見五人
畢復徵取五人如前奏聞召見特諭康熙三十年九月
二十九日

諭內閣

傳諭太常寺少卿沙拜向來廣東廣西鹽課雖屬地方

官管理而豪強之徒輒行占據不輸國課貿販私鹽因循陋習隱匿侵欺以致病商病民今特遴選爾沙拜遣往稽察兩廣鹽政職任初設彼地商人多屬京師豪貴之家鹽課弊端朕知之甚悉非令汝將前此之弊必究發而參劾之也爾蒞任後矢勤矢慎將積弊盡除商民咸利以裕國課而濟軍餉則爾之榮不必言矣爾素悉朕意若受人請託瞻徇情面不行革除積弊則欲保首領亦不可得也朕意兩廣一歲鹽課可充一歲軍餉汝之

休咎咸在此行勉之慎之特諭康熙三十年十月初二日

諭內閣

聞畿輔穀價翔貴遣戶部筆帖式一員往諭直隸巡撫
令其於所屬地方以蒸酒糜米穀者其加意嚴禁之康
熙三十年十月二十六日

諭內閣

朕以生癘之故冬至未詣

天壇行禮各官上表稱賀其停止之康熙三十年十月

二十八日

諭吏部

從來致治之道在正人心人心偏私則詐偽日生而習俗滋敝人心公直則囂競自息而庶績允釐朕蚤夜孜孜崇尚德教蠲滌煩苛期與中外臣民共適於寬大和平之治凡大小諸臣素經拔擢咸思恩禮下逮曲全始終即或因事放歸或罹咎罷斥仍令各安田里樂業遂生惟爾諸臣亦宜奉職恪共絕偏私而襄國事乃近見

內外各官間有彼此傾軋伐異黨同私怨交尋牽連報復或已所銜恨而反囑人代糾陰為主使或意所欲言而不直指其事巧陷術中雖業已解職投閒仍復吹求不止株累逮於子弟顛覆及於身家甚且市井奸民亦得借端凌侮蔑紀傷化不可勝言凡若所行雖跡甚詭秘朕總覽幾務已三十年此等情態知之最悉儻因仍陋習益致蔓延殊非朝廷所以體恤臣工保全愛惜之意夫讒譖媚疾之害歷代皆有而明末爲甚公家之事

置若罔聞而分樹黨援飛誣排陷迄無虛日以致釀禍
既久上延國家朕歷觀前史於此等背公誤國之人深
切痛恨自今以往內外大小諸臣應仰體朕懷各端心
術盡蠲私忿共矢公忠豈獨國事有裨即爾諸臣亦獲
身名俱泰儻仍執迷不悟復踵前非朕將窮極根株悉
坐以交結朋黨之罪爾部可即傳示中外使咸知朕意
特諭康熙三十年十一月初九日

諭內閣

黑龍江軍士及船戶人役以每歲耕稼穀尚不支奏請
若以此爲例每歲給發而所貯之穀有限遇需用米石
時必致匱乏遣戶部賢能司官一員會同黑龍江將軍
副都統應作何核減給與詳議奏聞康熙三十年十一
月十三日

諭戶部

朕前聞陝西西安鳳翔等處年歲不登民艱粒食特命
學士布喀星馳前往察勘賑濟頃來回奏稱西安府屬

咸寧等州縣衛鳳翔府屬鄱縣等三縣米價騰貴百姓
流移朕心深切軫念若不大沛恩施無以徧甦疾苦這
被災各地方康熙三十一年額徵銀米著通行蠲免又
聞甘肅巡撫所屬地方秋收豐稔米價較平著該督撫
會同詳議作何購買轉輸速行賑濟務俾比屋得霑實
惠不致仳離失所以副朕撫恤災黎至意爾部即遵諭
行特諭康熙三十年十一月十四日

諭禮部

自昔帝王敬天勤政凡遇垂象示儆必實修人事以答
天戒頃欽天監奏推算日食當在康熙三十一年正月
朔日夫日食為天象之變且又見於歲首朕兢惕靡寧
力圖修省惟大小諸臣務精白乃心各盡職業以稱朕
欽承昭格至意其元旦行禮筵宴著停止爾部卽遵諭
行特諭康熙三十年十一月二十四日

諭大學士伊桑阿阿蘭泰學士滿丕圖納哈思格
則德珠王國昌理藩院尚書額爾赫圖署侍郎

事學士達瑚

逃遁來降之喀爾喀杜楞言我原在巴圖爾厄爾克濟
濃之弟博即處博即爲大兵所敗步行逃脫於伊巴賴
地方遇巴圖爾厄爾克濟濃所屬奇七納台吉等博即
得馬匹糗糧往尋其兄而去巴圖爾厄爾克濟濃所食
既盡困窮已極其內互相劫奪現在厄即奈地方巴圖
爾厄爾克濟濃所屬台吉奇七納等未得追隨而去在
厄爾得木即舒呼地方厄即奈距嘉峪關有四日之程

等語西安之兵現戍寧夏著侍衛阿南達偕杜楞往至
寧夏與將軍馬喇提督孫思克及總兵官等會同詳議
偵探實信巴圖爾厄爾克濟濃所在果與嘉峪關相近
可以撲滅則酌量挑選滿洲綠旗兵遣往乘巴圖爾厄
爾克濟濃之窮困而剿滅之或可相機招撫二卽保克
西現在彼處即可遣往爾等與議政大臣會議奏聞康
熙三十年十二月初二日

諭戶部

朕撫馭區宇三十年以來早夜圖維惟以愛育蒼生俾
咸臻安阜爲念比歲各省額徵錢糧業已次第蠲豁其
歲運漕米向來未經議免朕時切軫懷所有京通各倉
米穀撙節支給數載於茲今觀歷年儲積之粟恰足供
用應將起運漕糧逐省蠲免以紓民力除河南省明歲
漕糧已頒諭免徵外湖廣江西浙江江蘇安徽山東應
輸漕米著自康熙三十一年始以次各蠲免一年至江
寧京口杭州荊州大兵駐防地方亦應預行積貯著將

康熙三十一年起運三十年漕米各截留十萬石存貯
倉廩令該地方官敬慎守視以備需用爾部即遵諭行
特諭康熙三十年十二月初四日

諭戶部

塞外聚穀甚屬要務故耕稼土田以廣積貯爲至切也
達爾湖之地其田以內府莊屯之人耕之可令總管內
務府於各莊屯內遣其丁壯其穀種耒耜及諸田器耕
牛皆令豫備於三旗內府官員新滿洲護軍披甲之中

熟諳農事者擇而遣之呼爾湖之地其田以八旗諸王莊屯之丁壯耕之其穀種耒耜及諸田器耕牛咸令豫備熟諳農事人員擇而遣之墾闢耕種之時稷與大麥油麥春麥四種穀皆可藝植稷宜多種之春麥宜少種之遣往耕田之人田既耕種畢則酌留耘田之人其餘人遣還穀既熟則所留耘田之人可以收穫此農人所食之米於古北口所貯米石中計口而授之西拉木倫之地其耕田悉照原議遣盛京人役前往俟農畢秋成

之後視豐收地方其治田人員該部議敘爾等其議以
聞康熙三十年十二月初七日

諭內閣

達爾湖呼爾湖西拉木倫地方耕田所需之牛著停其
捐助於每處遣戶部司官一員帶庫銀照數購買以給
與之康熙三十年十二月十二日

諭兵部

武職官員任寄封疆關係甚重必得其人始有裨益朕

所簡閱素悉之員俱已次第拔擢今宜選材以備任用
爾部行文各將軍總督提督巡撫及無提督省分總兵
官於武職官員內副將以下千把總以上有灼見人材
勇健諳練軍務整飭營伍愛惜士卒及行間効力曾經
立功者不論本省別省見任候補限文到三日內各舉
所知保奏不必彼此會同其在內八旗漢軍官員有人
才素優嫻於約束堪任要地者亦著各都統副都統保
奏爾部卽遵諭行特諭康熙三十年十二月十二日

聖祖仁皇帝御製文第二集卷十

欽定四庫全書薈要

聖祖仁皇帝御製文第二集卷十一目錄

勅諭

諭大學士伊桑阿阿蘭泰

諭大學士伊桑阿阿蘭泰王熙張玉書學士

王國昌滿丕圖納哈王尹方王揆李枏

諭修明史諸臣

諭戶部

諭大學士伊桑阿阿蘭泰

諭內閣

諭大學士伊桑阿阿蘭泰王熙張玉書學士

德珠溫保王國昌王尹方王揆李棟

諭兵部

諭大學士伊桑阿阿蘭泰學士德珠溫保王

國昌

諭大學士伊桑阿阿蘭泰張玉書學士傅繼

祖溫保王國昌王尹方王揆李枏

諭大學士伊桑阿阿蘭泰張玉書學士傳繼祖
溫保王國昌王尹方王揆李枏

諭大學士伊桑阿阿蘭泰張玉書尚書馬奇侍
郎凱音布學士傳繼祖溫保王國昌王尹方
王揆李枏

諭大學士伊桑阿阿蘭泰張玉書學士傳繼祖
溫保王國昌王尹方王揆李枏

諭大學士伊桑阿阿蘭泰

諭大學士伊桑阿阿蘭泰學士傅繼祖達瑚溫

保王國昌戴通

諭大學士伊桑阿阿蘭泰侍郎朱都納學士傅

繼祖達瑚溫保戴通王國昌

諭尚書庫勒納等

諭大學士伊桑阿阿蘭泰學士傅繼祖戴通王

國昌

諭大學士伊桑阿阿蘭泰學士傅繼祖席喇達
瑚戴通

諭大學士伊桑阿阿蘭泰學士席喇達瑚戴通
瑚德珠戴通

諭戶部

諭刑部

諭吏部都察院

諭大學士伊桑阿阿蘭泰學士席喇傳繼祖德
珠戴通安布祿

諭大學士伊桑阿學士席喇傳繼祖德珠溫保
戴通安布祿

諭大學士伊桑阿學士席喇傳繼祖德珠溫保
戴通安布祿

欽定四庫全書薈要卷一萬三千三十九集部

聖祖仁皇帝御製文第二集卷十一

勅諭

諭大學士伊桑阿阿蘭泰

去歲陝西西安等處年穀不收罔有積貯以致閭閻困苦至極已遣使賑濟之矣直隸所轄地方素有儲蓄或州縣稍有不登卽以所儲米穀從均贍給是以民生獲濟良多今年豐歉尚未可知陝西省府州縣現存米穀

之數應行察明先時預備至各省府州縣皆令積貯米穀數千石則裨益黎庶者大矣可下各該督撫等令各府州縣積貯米穀其所積穀數當逐一繕冊詳報戶部著九卿詹事科道等會議以聞康熙三十一年正月初二日

諭大學士伊桑阿阿蘭泰王熙張玉書學士王國昌滿丕圖納哈王尹方王揆李枏

前者纂修明史諸臣所撰本紀列傳曾以數卷進呈朕

詳晰披閱并命熊賜履校讐熊賜履寫簽呈奏於洪武
永樂本紀訾議甚多朕思洪武係開基之主功德隆盛
宣德乃守成賢辟雖運會不同事蹟攸殊然皆勵精顯
於一時謨烈垂諸奕世爲君事業各克殫盡朕亦一代
之主也銳意圖治朝夕罔懈綜理萬幾孳孳懋勉期登
郅隆若將前代賢君搜求其間隙議論其是非朕不惟
本無此德本無此才亦實無此意也朕自反厥躬於古
之聖君旣不能逮何敢輕議前代之令主耶若表揚洪

武宣德著爲論贊朕尚可指示詞臣撰文稱美儻深求
刻論非朕意所忍爲也至開創時佐運文武諸臣各著
勲績列傳之中若撰文臣事迹優於武臣則議論失平
難爲信史纂修史書雖史臣職也適際朕時撰成明史
苟稍有未協咎歸於朕矣明代實錄及紀載事蹟諸書
皆當蒐羅藏棄異日明史告成之後新史與舊書俾得
竝觀以備天下後世之公論焉前曾以此指面諭徐元
文爾等當知之康熙三十一年正月二十七日

諭修明史諸臣

朕自沖齡即在宮中披覽經史明實錄曾閱數過見其
間立言過當紀載失實者甚多纂修明史宜加詳酌如
弘治中太后思念崇王欲令入朝此亦情理之至常且
所封之地初不甚遠而一時大臣及科道官員交章爭
執以爲不可至云人民騷擾國勢動搖時已有旨召崇
王矣竟因人言而止夫書言以親九族九族旣睦若藩
王就封必不可召見則自古帝王所云睦族之道謂何

又正德實錄載午朝罷後於御道得匿名文簿一卷傳
旨詰問百官皆跪於丹墀時仆而暴死者數人暍而病
者尤衆夫夏月雖天時炎熱何至人多暴卒且行間將
士每披堅執銳戮力於烈日之中未聞因暑而致死豈
朝堂之上病暍若斯之甚耶所云盡信書不如無書此
之謂矣至於宦官爲害歷代有之明如王振劉瑾魏忠
賢輩負罪尤甚崇禎時誅鋤閹黨極爲善政但謂明之
亡亡於太監則朕殊不以爲然明末朋黨紛爭在廷諸

臣置封疆社稷於度外惟以門戶勝負爲念不待智者知其必亡乃以國祚之顛覆盡諉罪於太監謂由中官用事之故烏得爲篤論耶朕宮中所用太監止令供灑掃奔走之役一頓一笑從不假借所以數十年以來太監皆極貧乏有不能自給者爾諸臣想亦悉知朕非信用太監之主惟朕可爲此言作史之道務在秉公持平不應膠執私見爲一偏之論今特與諸臣言之宜共知此意康熙三十一年正月二十九日

諭戶部

朕勤求治理念切民依凡有往來人等必以年歲之豐歉雨澤之有無一切問閭情形備悉諮訪前聞陝西西安鳳翔各屬飢荒已經特頒諭旨蠲免錢糧並發帑金專遣大臣賑濟仍撥給別省錢糧刻期運送務使均霑實惠人獲更生近又聞頒賑之前尚有貧民散入四方流離失業勢不能復還鄉井儻不曲加撫綏必致轉於溝壑深爲可憫凡流民所至地方應令該省督撫董率

有司區畫賑濟令各得所其賑濟過人口數目著具冊
題報有能酌量資給俾回原籍者一併造冊具奏至於
湖廣襄陽等處距潼關相近且道路平坦易於轉輸襄
陽等處所有積貯米穀應令該督撫運至潼關陝西督
撫接受轉運庶於散給兵餉賑濟饑民均有裨益應作
何輓運爾部作速詳議具奏特諭康熙三十一年二
月初四日

諭大學士伊桑阿阿蘭泰

陝西省西安鳳翔兩府所屬地方去歲遇災雖曾自京師頒發帑金遣官賑濟然百姓仍有流移者此皆無積貯預備之故也今靳輔已簡任河道總督矣靳輔於河道情形熟練曉暢可截今年漕米二十萬石交與靳輔作何酌量僱船由黃河輓運抵山西蒲州等處預爲積貯即偶遇災傷既有所備於軍儲民生咸獲裨益矣至由黃河逆流轉運勢屬艱險若有米船損壞之事免其議罪則靳輔亦得殫心盡力黽勉報稱可降旨九卿會

議爾等亦同靳輔議之康熙三十一年二月初四日

諭內閣

江北漕米速行截畱二十萬石至蒲州等處積貯預備
誠爲有益但自砥柱至蒲州一帶地方可否輓運若遣
部中司官往視或勘閱草率借端推諉稱爲不可若交
與地方官則退縮畏事託辭勞民或以彼地豐收無處
需米指稱不必輓運或因循遲緩以致冰凍指稱不可
輸輓如此則特命運米亦屬徒然矣凡事身任其責殫

心奉公竭蹶圖之無有不奏效者前黑龍江置戍轉運
軍儲衆皆謂地屬初闢其事爲難朕惟斷自一己見諸
施行今屯兵列障運道開通絕塞遐邊丕振功效此即
已著之實驗也可下九卿議之康熙三十一年三月初
四日

諭大學士伊桑阿阿蘭泰王熙張玉書學士德珠
溫保王國昌王尹方王揆李棟

總河靳輔年邁而有疾河務所關至要當豫遣材幹之

人用副靳輔俾習練河務則異日可以接續綜理其下
九卿議奏康熙三十一年三月十六日

諭兵部

國家簡用武臣委任封疆重寄專期軍民輯睦邊境又
安其實有宣力累年茂樹偉伐者則旌庸之典必加渥
焉甘肅提督孫思克久歷邊地熟諳機宜當秦省用兵
之時素著勞績自任提督以來益殫謀猷實心幹濟惠
愛洽於士卒威望警乎外彛特沛殊恩用昭寵獎著加

太子少保給一拜他喇布勒哈番以示朕展勲酬勞至
意爾部即遵諭行特諭康熙三十一年三月十七日

諭大學士伊桑阿阿蘭泰學士德珠溫保王國昌
近觀科道等官竟無條奏者夫設立科道特欲其有所
建白也當言之時應不時具奏可以此意傳與科道官
知之康熙三十一年三月二十九日

諭大學士伊桑阿阿蘭泰張玉書學士傅繼祖溫
保王國昌王尹方王揆李枏

喀爾喀王貝勒貝子公台吉等向未入覲京師初次來朝者仍依原賞喀爾喀之例給之若曾經入覲一次已蒙錫予而復來者皆準四十九旗例以頒賚焉其下理藩院註冊著爲定例遵行可耳康熙三十一年四月十九日

諭大學士伊桑阿阿蘭泰張玉書學士傅繼祖溫保王國昌王尹方王掞李杲

遣往察看黃河之前鋒統領碩鼎等差回奏稱察看黃

河自寧夏至潼關皆可舟運但龍王站一處水勢陡絕湍激不可行船其間由陸路起剝十里過水陡之處卽由船運便可直至潼關西安矣旣如此應差工部賢能司官一員會同巡撫葉穆濟於船窩裏地方造可載一百石之船二百隻逆流至龍王站下停泊預爲備用又聞歸化城北翁魁等山產有材木令遣八旗鐵匠木匠歸化城派出夫役伐木踞板運至湖灘河朔津口造裝載一百石之船二百隻此造船所需鐵與油麻等物自

該部發往船工既畢之後將大同米石出沙虎口轉運至湖灘河朔津渡泊船之處俟彼時再議造船之暇自大同至湖灘河朔工所其轉運之路應察看詳明預加料理爾等會同戶工二部確議以聞康熙三十一年五月初一日

諭大學士伊桑阿阿蘭泰張玉書尚書馬奇侍郎
凱音布學士傳繼祖溫保王國昌王尹方王揆
李枏

聞山西平陽府等處雨水協時年麥豐收其直必賤可
遣賢能官員往彼購買預爲積貯不惟有益於民異日
儻有需用亦得所資矣可令九卿詹事科道會議以聞
康熙三十一年五月初一日

諭大學士伊桑阿阿蘭泰張玉書學士傅繼祖溫
保王國昌王尹方王掞李耒

積穀者至要之務也誠有所積貯雖遇災傷斷不致於
饑饉但小民不知儲蓄每值豐收之年恣意糜費及逢

儉歲遂底困窮今時屆麥秋可勅各該地方官勸諭百姓比戶量力共相樂輸委積儲峙州縣官將捐助者姓名與米數註冊秋成之後亦倣此行焉其春時乏食者貸與之至秋照數收入以爲積蓄夫每年於麥穀告登之候勸勉捐輸則數歲之間倉廩充裕即罹災祲民食自可不虞匱乏矣爾等會同九卿詹事科道議奏康熙三十一年五月初二日

諭大學士伊桑阿阿蘭泰

今年陝西西安地方三春雨水愆期秋收豐歉未可預
計襄陽者附近西安形勝之地也可將截留江寧荊州糧
各十萬石交與該督撫以官船運至襄陽先時儲蓄其
下九卿詹事科道即行會議以聞康熙三十一年五月
初九日

諭大學士伊桑阿阿蘭泰學士傅繼祖達瑚溫保
王國昌戴通

西安巡撫布哈疏稱雨水未足人民患病者頗多夫雨

水不足則秋收難望若何拯濟其疾病若何救治可下
九卿科道會議以聞康熙三十一年五月二十四日

諭大學士伊桑阿阿蘭泰侍郎朱都納學士傅繼
祖達瑚溫保戴通王國昌

朕思此時正當簡閱軍旅以備調遣每佐領撥烏鎗護
軍各一人撥前鋒親軍護軍各十人漢軍火器營兵撥
二千人如無須調遣朕巡歷塞外時親率以往此兵各
給整理器械銀十兩使今冬竟不徵發則所給銀兩可

於軍餉之內寬緩其期零星除扣之其下旨議政大臣
各都統將所派禁旅器械軍裝皆令全具無缺以備一
有調遣立可啓行大臣官弁併擬出焉此師不過預備
而已可將是意諭軍士知之康熙三十一年五月二十
八日

諭尚書庫勒納等

審事畢爾等親齎來奏知府副將在邊疆啓隙生事以
未叛指爲已叛擅興師旅說報擊敗者事聞軍機即行

加戮何必遲疑爾等會同總督審明卽於彼地正法示
衆否則遐邊遠域啓隙謊報者安所懲戒耶至於土司
爾等如再三招徠安輯彼仍抗拒不出會同總督撲剿
之可將此旨繕寫呈覽交大學士等特諭康熙三十一年
七月初八日

諭大學士伊桑阿阿蘭泰學士傅繼祖戴通王國
昌

將軍薩布蘇奏請達呼里西白之五百兵令其學習烏

鎗夫以邊兵訓練火器所言雖是但達呼里西白之衆
遷徙甫至未獲寧居盡其族類槩令學習似爲未當或
俟之數年安土樂業始令操練烏鎗或應作何籌度另
爲訓練其密咨薩布蘇具議以覆康熙三十一年七月
十五日

諭大學士伊桑阿阿蘭泰學士傳繼祖席喇達瑚
戴通

聞西安所屬驛站凋敝可交該督撫整頓之彼土民生

近日情形比前如何田禾收穫豐歉如何秋麥已播種
乎抑猶未也可令詳明踏看來奏康熙三十一年九月
十四日

諭大學士伊桑阿阿蘭泰學士席喇達瑚戴通

今所備禁旅之內每佐領撥護軍七名其前鋒軍則簡
四百名火器營兵則分其半於十月杪遣赴大同飼養
馬匹預備徵調應遣大臣令兵部奏請曾隨朕之每佐
領護軍一人可除出之至京師簡軍預備其事宜亦令

具議以聞康熙三十一年九月十五日

諭大學士伊桑阿阿蘭泰學士席喇傳繼祖達瑚
德珠戴通

筆帖式季慶鶴力保盜賊情殊可惡其革職發往黑龍
江效力可改簽批發前者工部筆帖式愛新阿監造新
滿洲房屋曾有梁木摧折致新滿洲被壓而斃聞其爲
人不孝不義至於已極八旗之衆無弗知者乃工部堂
官不行題參褫革反委爲司員令監工作夫筆帖式者

漸次陞擢可爲司員可爲大臣者也如此不孝不義之人豈可爲大臣與司員哉其嚴飭各部院有似此孝義不修行止謬亂好生事端代寫詞狀者察出革其筆帖式儻被革者異日挾仇訐告朕決不聽理也可咸傳諭之康熙三十一年十月初二日

諭戶部

陝西西安等處地方連歲凶荒繼以疾疫因而閭閻失業游致流移朕軫恤民艱焦勞宵旰自去歲冬月以來

頒發帑金蠲免正賦輓輸積穀轉運漕糧屢次特遣大臣察勘多方賑濟念國家所重惟在養民目今秦省雖薄有秋收但民間匱乏已極儻非格外加恩無以使積困盡甦轉徙盡復陝西巡撫所屬府州縣衛所康熙三十二年地丁銀米著通行免徵從前所有積欠未完錢糧亦著通行蠲豁務俾比屋同霑實惠小民咸慶更生用稱朕子愛元元撫育安全至意爾部即遵諭行特諭
康熙三十一年十月初六日

諭刑部

朕保乂黎元崇尚寬大每於刑獄之事輒厘矜恤之懷
秦省西安等處地方比歲薦饑閭閻困苦業已多方賑
卹屢諭蠲租尤宜大沛仁恩特加赦宥凡陝西巡撫所
屬今年秋審情真緩決人犯內除十惡及軍機獲罪官
員犯罪不赦外其餘自諭旨到日通省免死照例減等
發落有見在審擬未經結案者亦如之嗣後務令革心嚮
善副朕法外生全至意爾部即遵諭行特諭康熙三十

一年十月十二日

諭吏部都察院

國家設立言官職司耳目一切吏治民生得失利弊皆宜殫思畢慮據實直陳近見滿漢科道官員建白甚少殊非朕責望言路之意嗣後應各矢公忠研求時務凡可以裨益國家之事悉據所見奏聞以俟採擇但不得懷挾私情紛更定例剝襲陳言浮泛塞責其有真知灼見應糾劾者即行參奏亦不得暗受囑託代人報復苛

責細事希圖傾陷爾部即傳諭遵行特諭康熙三十一年十月二十三日

諭大學士伊桑阿阿蘭泰學士席喇傳繼祖德珠
戴通安布祿

將軍薩布蘇佟寶等奏請驛站缺丁依數頂補無妻室者給以婦人驛遞再爲增置壯丁馬畜錢糧俱行添設則驛站可不致困敝朕思驛站困敝者皆該將軍等不省徭役不簡事件絕非要務槩令馳驛勒索之所致也

雖添置驛丁增給錢糧事若不務簡省究復何益且所需婦人爲數多矣取給一時將焉可得伊等在彼其可得緣由或有成算耶可勅該將軍薩布蘇佟寶等如何減省徭役不致凋敝驛遞所缺男婦從何充補會同盛京將軍確議報部康熙三十一年十二月二十一日

諭大學士伊桑阿學士席喇傳繼祖德珠溫保戴
通安布祿

大同右衛屯駐大兵有事則大同總兵官必協同征行

其鎮標兵及沙虎口協標兵皆當改爲騎卒可下兵部
議奏康熙三十一年十二月二十八日

諭大學士伊桑阿學士席喇傳繼祖德珠溫保戴
通安布祿

聞西安米價尚復翔貴流民還籍者少朕爲陝西地方
民生時存諸懷必如何措施然後於民有濟蓋孳孳不
置也先是聞自湖廣之襄陽抵陝西商州水路可達已
遣郎中蘇赫納閱視今問之內大臣索額圖乃亦乘船

自商州行至襄陽夫西安米價如尚翔貴則流民不能復歸本籍自商州至襄陽既有水路可將現運至襄陽之米二十萬石即自襄陽水路轉輸至商州更自商州轉輸至西安俾相販糶則陝民之饑者均得蘇息矣可特遣京師賢能大臣一員會同總督丁思孔總兵官王化行等率道員劉暄將轉運米石及招還流民之事委之專理其自襄陽運至西安之米以湖廣價直止加算所運脚費與之貿易則米價必賤於民生大有裨

益而流移之衆亦獲速還故土所得米直齎至湖廣復
買米糧亦依此法轉輸平糶當俟陝西流民悉還本籍
米價既賤之後方行停止爾等會同速議以聞康熙三
十一年十二月二十八日

聖祖仁皇帝御製文第二集卷十一

欽定四庫全書薈要

聖祖仁皇帝御製文第二集卷十二目錄

勅諭

諭大學士伊桑阿阿蘭泰學士席喇傳繼祖溫
保戴通安布祿

諭內閣

諭內閣

諭內閣

諭內閣

諭內閣

諭大學士伊桑阿阿蘭泰尚書馬奇顧八代索

諾和圖納薩木哈班第都御史沙海侍郎溫

達滿丕學士席喇傳繼祖安布祿

諭內閣

諭大學士伊桑阿阿蘭泰王熙張玉書李天馥

學士席喇傳繼祖溫保戴通安布祿王尹方

李栴李應薦

諭領侍衛內大臣郎談等

諭內閣

諭內閣

諭內閣

諭領侍衛內大臣伯費揚古

諭內閣

諭內閣

諭戶部

諭內閣

諭內閣

諭內閣

諭戶部

諭戶部

諭大學士伊桑阿阿蘭泰學士傅繼祖溫保德

珠戴通沈圖常書

諭兵部

欽定四庫全書薈要卷一萬三千四十集部

聖祖仁皇帝御製文第二集卷十二

勅諭

諭大學士伊桑阿阿蘭泰學士席喇傳繼祖溫保
戴通安布祿

聞厄魯特噶爾丹無所得食困迫已極仰食於其所屬
番人而有來哈密之信哈密於我邊塞相去最近可發
寧夏駐防滿兵令往甘肅提督孫思克處爲之預備孫

思克所轄官兵亦當令其整頓豫備此外本省附近地方官兵有宜調發預備者令孫思克一面調發一面奏聞又貝子察汗巴爾之弟班第自瑚瑚腦兒來時由西喇塔喇於邊內行來遇伊拉固克三胡圖克圖亦由邊內行往如此潛行來往邊塞官員何以不復稽察耶此亦當檄孫思克邊塞官員令其嚴加戒飭汝等會同兵部密議以聞康熙三十二年正月初二日

諭內閣

日者盛京招民有議敘之例今西安等處流民尚有未歸本業者茲西安等處流民招復幾戶復歸本業助給牛種等物令之耕種收穫一季者其宜議敘吏戶二部察例以聞康熙三十二年二月初一日

諭內閣

西安米價尚爾翔貴戶部可招募身家殷實各省富商給以正項錢糧並照驗文據聽其於各省地方購買糧米運至西安發糶所得利息聽商人自取之如此往來

運販待西安米價得平之時但收所給原銀大有裨益也其具議以聞康熙三十二年二月初一日

諭內閣

騎射乃我國家振興要務朕深悉其由於三旗內府佐領中幼稚特命官教之皆各嫻習騎射由是以觀騎射之優劣繫於教與不教耳凡茲稚子不自幼時教習則騎射之事漸至衰替今於八旗官學生及佐領中間散稚子亦當專官教習之汝等會同八旗部統議以聞康

熙三十二年二月初五日

諭內閣

廣東省鹽丁鹽課自康熙二十二年於原額外加銀一萬四千二百四十六兩此所加銀今歲可免其半康熙三十二年二月初八日

諭內閣

宗族之始皆一祖所生當極致親睦共相愛卹扶持以爲生也今見諸王以下互相讒害樂禍幸災略無親睦

之誼凡若此者朕知而不言誰復言者吾宗室中如此於我人民得無愧乎以親九族九族既睦書有之矣且或者同爲宗室以他祖父之名名其子若孫者有之今吾宗室之中不定爲親睦以相愛卹扶持之道長此安窮無所底止朕意此後入八分公以上諸吉凶事會集之禮依向所定者行之如未入八分公以下至於閑散宗室其吉凶之事亦宜定會集儀式此皆令八旗會集則不勝其繁矣其令本翼會集馬喪事則一旗之中爲

之服別旗惟去其纓又閑散宗室中有極貧者一有吉凶之事則稱貸而爲之致有窘迫者凡若此類諸王以下閑散宗室以上各以其意出助銀一兩或數星出者旣不以爲難而得之者良有所益庶不至苦於債負矣其會集自其身之品級以下者而會集之閑散宗室無品級者則視其父之品級會集凡會集不至者有司者察叅如此則皆相識而親不惟是也有爲不善者遇之亦可教以正若貧宗室亦不因於爲生此欲我宗室和

協優游以安處之意也又宗室中今名有犯者宗人府
悉察改焉自茲以往歲所送名亦即詳察其有犯者駁
之令改焉朕此旨汝等同滿洲尚書侍郎宣示諸王及
閑散宗室令其會同定議以聞康熙三十二年二月初
十日

諭大學士伊桑阿阿蘭泰尚書馬奇顧八代索諾
和圖納薩穆哈班第都御史沙海侍郎溫達滿
丕學士席喇傳繼祖安布祿

聞噶爾丹艱於食窮困已極來就食於哈密哈密近在
塞下若不豫爲設備乘隙事生其時不及防矣今雖於
甘肅令滿洲綠旗兵預備而兵力尚單可自京師每佐
領出兵二人由邊外往寧夏就提督孫思克處預備陝
西總督標下火器營兵出二千人馬兵出千人亦遣往
孫思克處令其預備汝等可同議政大臣領侍衛內大
臣索額圖郎談副都統阿南達議以聞康熙三十二年
二月十四日

諭內閣

往年山東旱遣故尚書蘇赫禱於泰山今歲陝西郡縣
雨澤雖布而往者數罹旱災矣夫華山關中名山也宜
遣大臣祀之卿等同禮部諸臣議以聞康熙三十二年
二月十五日

諭大學士伊桑阿阿蘭泰王熙張玉書李天馥學
士席喇傳繼祖溫保戴通安布祿王尹方李柟
李應薦

衛既齊本降級調用一州判耳以其素有虛名特復其原官以檢討又超擢爲布政使未幾內陞府尹累加遷擢至副都御史遂又授爲貴州巡撫受國家恩可謂至矣爲府尹時其條奏疏中自詡比之召伯君陳假若其所行者一二符其所言猶有可恕者乃初至貴州遂私動兵革妄生邊事殺無罪苗民詐報軍功種種欺誑凡此惡行雖常人所不爲而彼以古人自況反不知忌憚而爲之蓋於彼所言者略不相顧而大負國家之恩矣

彼平昔但務虛名妄稱道學委之以事毫無實濟若此
欺罔世人沽取虛名之輩不得不重加懲創為欺世盜
名者之戒汝等同九卿於午門外召既齊問之康熙三
十二年二月二十七日

諭領侍衛內大臣郎談等

近聞厄魯特噶爾丹得食甚艱有來哈密地方覓食之
信哈密逼近甘肅邊界若不預為之防恐彼乘隙生事
一時不及設備致失機宜故遣發禁旅特命爾領侍衛

內大臣郎談為昭武將軍前往爾統領大軍赴孫思克處駐劄防備一切事務爾同西安將軍博濟振武將軍提督孫思克商酌而行簡閱兵馬餵養肥壯整飭器械務嚴束官兵不得騷擾百姓其一應錢糧聽有司各官應付地方事情不得干預至於官兵俱有部頒紀律如有違犯爾等會同商酌照依定例處分不得姑息以致紀律懈弛爾等須會商不時遣人遠探消息儻噶爾丹有犯邊情形爾等有出口應行機宜一面奏聞一面施

行母失事機爾等其慎之故諭康熙三十二年三月二十一日

諭內閣

山陵掌印郎中古塞邁圖桑額員外郎阿布喇彼皆効力於

山陵年且久矣竟不得遷良可憫也可兼太常寺卿銜視其兼銜給之俸汝等議以聞康熙三十二年三月二十六日

諭內閣

見各省解送物料其中亦有無用者亦有此間購買價輕而可得者其下戶部詳議其當解不當解者具以聞將以紓吾民焉康熙三十二年三月二十六日

諭內閣

聞自黃河逆流而上船運粟至朱仙鎮自朱仙鎮陸輓數里達於黃河以小船載運可抵潼關若此輓運可歟否歟又不涉黃流而他河有可輸運者歟抑果無歟其

勅于成龍令擇才敏者往審視之悉以達內閣卿等以聞康熙三十二年四月初六日

諭領侍衛內大臣伯費揚古

茲以歸化城乃邊外各部落扎薩克總要之地凡西北蒙古地方有事皆可預為防禦現在雖有土墨忒兩旗官員兵丁但隊伍紀律素不嚴整今又增蒙古兵甚多不可不特設將軍管理總率兩旗都統副都統訓練新舊官兵整理器械法制初定關係甚重茲命爾領侍衛

內大臣伯費揚古前往管理安北將軍事務俟一年更換爾駐劄歸化城統轄兩旗官兵及新增兵丁務須申明紀律謹練士卒整飭隊伍修備器械革除積弊勸課耕種廣儲糧糗不時偵探各處消息一切事宜與兩旗都統副都統計議而行凡有軍機事務即時奏請候旨施行爾受茲委任須殫心竭力宣布德威操練官兵一如禁旅斯克稱委任爾其慎之故諭康熙三十二年六月十五日

諭內閣

聞陝西雨水最多山東雨水亦多此兩省雨多則黃河之水必大惟此之故朕時縈於懷殷殷慮之可遣戶部員外郎伊巴里再擇司官一人往見于成龍詳問水勢及堤岸情形來奏康熙三十二年六月二十一日

諭內閣

朕於各省往來者及請安而至者必問其地方情形雨澤應時與否頃自江南浙江來者問之云江浙間今年

甚旱戶部其擇司官二員一遣往江南一遣往浙江詳
詢江南總督浙江巡撫雨水情形來奏康熙三十二年
六月二十八日

諭戶部

朕撫御寰宇早夜孜孜惟以實惠及民俾登康阜為念
廣西四川貴州雲南四省俱屬邊地土壤磽瘠民生艱
苦與腹內舟車輻輳得以廣資生計者不同朕時切軫
懷歷歲以來屢施恩卹廣西省康熙十六年通省錢糧

十七年十八年民欠錢糧貴州省二十二年秋冬及二十三年春夏地丁錢糧又貴州四川二省二十五年未完及二十六年應徵錢糧雲南省二十七年以前屯地積欠錢糧俱經次第蠲豁茲念育民之道無如寬賦矧邊省地方非再沛優恤之恩則閭閻無由充裕所有康熙三十三年四省應徵地丁銀米著通行蠲免仍行文該督撫徧加曉諭令人霑實澤以稱朕加惠遠省民生至意如有不肖有司借端朦混私自徵收者該督撫指

名奏劾從重治罪爾部卽遵諭行特諭康熙三十二年八月初三日

諭內閣

江浙二省今年夏旱雖不成災秋收量必有限若漕糧照常徵收起運恐民食將至匱乏朕爲此常切軫念除浙江漕糧已經改於今年蠲免外其江南漕糧今年或三分免一或免一半俟至該省應蠲年分將今年所免米石照數補徵起運於漕糧既無缺少官民大有裨益

著滿漢大學士等會同戶部堂官倉場侍郎等作速確
議具奏康熙三十二年九月十六日

諭內閣

前尚書科爾坤諳練事務在戶部時著有勤勞被叅之
事殊不明晰以其年邁不復任用可復其尚書銜又米
漢雯被叅之事亦不明晰供奉內庭勤勞有年可復其
原官特諭康熙三十二年十月初十日

諭內閣

聞山東今年田收之後九月中蝗螟叢生必已遺種於
田矣而今歲雨水連綿來春少旱蝗則復生未可知也
先事豫圖可不爲之計歟乘時竭力盡耕其田庶幾蝗
種瘞於土而糜爛不復更生矣若遺種卽有未盡來歲
復萌地方官卽各於疆理區畫逐捕不使滋蔓其亦大
有益也命戶部速牒直隸山東河南山西陝西巡撫等
示所領郡縣咸令悉知田則必於今歲來春皆勉力耕
耨蝗螟之災務令消滅若郡縣有不能盡耕耨其田者

蝗或更生則必力爲捕滅毋使蝗災爲吾民患康熙三十
十二年十月初十日

諭戶部

陝西西安鳳翔二府地方連被災傷朕多方賑救轉粟
蠲租又招集流移散給牛種然後四方仇離之民漸次
復還鄉井今歲雖雨澤霑足百穀阜成而人民甫脫饑
寒未饒生計若明歲應徵錢糧卽令輸納誠恐閭閻儲
蓄終難充裕西鳳二府屬被災州縣衛所康熙三十三

年糧米照舊徵收外其地丁銀兩著通與蠲免尔部即行文該督撫嚴勅各屬徧加曉諭務俾均霑實惠以稱朕愛養休息至意如有不肖有司濛混私征者該督撫指名劾奏從重治罪康熙三十二年十月十二日

諭戶部

朕念切民生時厯宵旰或在宮禁之中或經巡省之地務以編氓疾苦備悉諮詢其從各省來京陛見官員及往來奉使人等亦無不以該省雨澤曾否應時田畝有

無收穫竝閭閻資生情形一一體訪比年以來因國家
經費尚充遂將各省地丁額賦及舊欠錢糧節次蠲免
即從前未經停征之漕糧亦逐年免徵總欲使海隅蒼
生培固元氣庶臻於家給人足之風今歲畿輔地方雖
禾稼未獲稔收初意小民糊口之需猶足資給未必生
計遂致艱難頃者展謁

山陵沿途察訪民隱見今歲雨水過溢田畝被淹沒者
甚多穀耗不登米價翔貴又聞順天河間保定永平四

府所屬皆然目前米價既貴將來春夏之際時值益昂
小民必艱粒食此朕目所親覩若來歲錢糧仍然徵收
朕心實有未忍順天河間保定永平四府康熙三十三年
應徵地丁銀米著通行蠲免所有歷年舊欠悉與豁
除行文該撫諭各屬務令人霑實惠以副朕子育黎元
至意爾部卽遵諭行特諭康熙三十二年十一月二十
五日

諭大學士伊桑阿阿蘭泰學士傅繼祖溫保德珠

戴通沈圖常書

行間被創及殘廢者雖已給身價之半而不食錢糧則
貧者無以爲生此人皆奮力兵陣至於殘廢良可憫惻
茲後若此殘廢中尚可支持者充南苑門甲倉庫諸地
老人缺給以錢糧前爲護軍校驍騎校而有可支持者
諸館之首領及其副缺用之康熙三十二年十二月十
四日

諭兵部

本朝滿洲官兵從來精銳驍勇遇寇必克所向無敵前
厄魯特噶爾丹之役官兵不能悉體朕意即行剿滅致
失機會罔奏膚功朕每念及時恚於懷故比年以來簡
閱官兵歲凡兩舉朕躬臨指示訓誨項閱武時見諸士
卒行列整齊隊伍明晰進退嫻熟嚴肅無譁所有軍令
無不遵守該管官員號令約束既嚴且善此皆官兵協
志同心各加奮勵所致朕心深爲嘉悅八旗前鋒護軍
撥什庫驍騎兵等各賞給一月錢糧閒散官員照護軍


給一月錢糧火器驍騎兵亦照護軍賞給有管轄職掌
官員悉賞給內庫緞足其賞賜緞足戶部會同總管內
務府衙門議奏這次閱武時官員內有降級罰俸者俱
准開復以示朕體恤將士申明賞罰之至意至八旗步
軍官兵有察緝盜賊巡理道路等役甚多極為勞苦步
軍亦各賞給一月錢糧管步軍官員亦各賞給緞足獎
勤恤勞用稱朕意爾部即遵諭行特諭康熙三十二年
十二月二十日

1/20/2011 11:54 AM 1/20/2011 11:54 AM

157



聖祖仁皇帝御製文第二集卷十二



總校官庶吉士臣侍朝

校對官檢討臣郭寅

謄錄監生臣許祖懷

欽定四庫全書叢要

集部

聖祖仁皇帝御製文二集卷十

三至五

詳校官原任編修臣徐立綱



欽定四庫全書薈要

聖祖仁皇帝御製文第二集卷十三目錄

勅諭

諭內閣

諭內閣

諭大學士伊桑阿阿蘭泰

諭內閣

諭戶部



諭大學士伊桑阿阿蘭泰

諭內閣

諭內閣

諭內閣

諭內閣

諭領侍衛內大臣索額圖大學士伊桑阿阿蘭

泰尚書馬奇索諾和

諭戶部

諭內閣

諭戶部

諭大學士伊桑阿學士溫保戴通沈圖宋柱陶

岱侍郎席喇

諭內閣

諭內閣

諭大學士伊桑阿阿蘭泰

諭大學士伊桑阿阿蘭泰

諭內閣

諭內閣

諭內閣

諭大學士伊桑阿阿蘭泰王熙張玉書學士溫

保戴通沈圖宋柱李枏顧藻陸某徐嘉炎

欽定四庫全書薈要卷一萬三千四十一

集部

聖祖仁皇帝御製文第二集卷十三

勅諭

諭內閣

黑龍江墨爾根波爾得之地官員兵丁與索倫達虎里之人助其耕種亦有年矣若仍前相助力作其官員兵丁及索倫達虎里之人皆致勞苦此數年來所種之穀儻足以備用則集衆力以耕作可以停止著將軍薩布

蘇詳議具奏遣兵部筆帖式一人往康熙三十三年正月三十日

諭內閣

據戶部所察霸州等十州縣存貯米五萬七千五百餘石穀八百石天津衛存貯米一萬石穀四萬四千一百餘石此米穀現在倉與否足以賑給與否若足用則以餘米平價糶與百姓可行與否山東漕糧截留數萬石平價糶賣則穀價不騰於民大有裨益今輓至何州縣

平價以糶應截留米若干萬石即遣戶部司官一員至
巡撫郭世隆處令其逐一迅速詳議付彼齎奏康熙三
十三年二月初一日

諭大學士伊桑阿阿蘭泰

直隸所屬被災之霸州永清等州縣其發粟賑濟及以
倉米平價糶賣彼地小民得沾實惠與否可遣官察視
之爾等與九卿詹事科道會議以聞康熙三十三年三
月初八日

諭內閣

進士選取庶吉士教習讀書所以造育人材備他日之用司教習者理宜嚴加督課使之勤勉嚮學此番考試庶吉士觀其所學甚劣較曩時庶吉士迥然不及此皆傳繼祖等教習怠弛不專心致志之所致也傳繼祖等下吏部嚴察具奏康熙三十三年三月十六日

諭戶部

山西平陽府澤州沁州所屬地方前因蝗旱災傷民生

困苦已經蠲免額賦竝加賑濟而被荒失業之衆猶未
盡覩幹寧其康熙三十年三十一年未完地丁錢糧及
借賑銀米若仍令帶征刻期完納誠恐閭閻力絀益致
艱難著將所逋欠錢糧五十八萬一千六百餘兩米豆
二萬八千五百八十餘石通行蠲豁用紓民力爾部行
文該撫嚴飭該府州縣官悉心奉行務俾人盡實惠儻
有已完在官捏稱民欠及已奉蠲免仍復重徵官吏作
奸侵漁中飽一有發覺定以軍法從事遇赦不宥爾部

即遵諭行特諭康熙三十三年三月二十三日

諭大學士伊桑阿阿蘭泰

今值春暮草生之時噶爾丹與策旺阿拉布灘互相攻戰以至近吾邊境未可知也簡選西安滿洲兵一千五百人將軍博濟親帥之此勅書到時速往將軍孫思克處預備若有邊警與孫思克商酌以行將軍郎談等所帥之兵仍駐寧夏孫思克等若有所征行待其傳檄即時趨赴共相商酌以行康熙三十三年三月二十八日

諭內閣

朕處深宮之中日以閭閻生計為念每巡歷郊甸必循
視農桑周諮耕耨田間事宜知之最悉誠能豫籌穡事
廣備災祲庶幾大有裨益昨歲因雨水過溢即慮入春
微旱則蝗蟲遺種必致為害隨命傳諭直隸山東河南
等省地方官令曉示百姓即將田畝亟行耕耨使覆土
盡壓蝗種以除後患今時已入夏恐蝗有遺種在地日
漸蕃生已播之穀難免損蝕或有草野愚民云蝗蟲不

可傷害宜聽其自去者此等無知之言切宜禁絕捕蝗
弭災全在人事應差戶部司官一員前往直隸山東巡
撫令申飭各州縣官親履隴畝如某處有蝗即率小民
設法耨土覆壓勿致成災其河南山西陝西等省亦行
文該撫一體曉諭欽依爾等將此事交與戶部遵行康
熙三十三年四月十三日

諭內閣

盛京輓運原有船百艘乃實有用之具也存留預備凡

遇緩急為益良多盛京工部無故奏而廢棄之今年從山東天津所運之米因乏轉運之船遂致遲悞盛京工部堂司官著該部嚴訊議罪具奏康熙三十三年閏五月初三日

諭內閣

保護中河堤岸之子堤總河于成龍前奏稱最為緊要請急行修築今又奏言水勢盛長難以興工俟水涸之時始行修治朕思河務所係甚重必待水涸始修儻夏

秋水澤泛漲保無有沖決隄岸之事乎可速勅于成龍
再加詳悉酌定具奏康熙三十三年閏五月初十日

諭內閣

問往湖灘河朔送船官員言今年黃河之水較每年甚
大上流之地水勢既盛至江南地方則黃河隄岸可危
皆未可知也遣員外郎綽奇斯治豫馳驛往于成龍處
今年水勢何如有無沖決詳悉詢問還奏康熙三十三
年六月二十日

諭領侍衛內大臣索額圖大學士伊桑阿阿蘭泰

尚書馬奇索諾和

尚書班第奏稱和托郭特之根敦代青遣二十人往偵探噶爾丹信息行十日遇厄魯特二人殺其一擒其一回詣根敦代青所五日而至根敦代青以所擒厄魯特之人皇上或有所詢問故奏聞遣來班第等遇之詢問具奏問所擒厄魯特色楞供云噶爾丹於去年春冬間二次遣人窺根敦代青所居處今年正月來於科革朔

東杭幾爾查克地方居住等語根敦代青聞噶爾丹移營近彼前進遂亦向內移營於土喇之西卜顏哈灘巴圖魯處觀噶爾丹之前進情形當是圖根敦代青而來不遇則隨其蹤跡而求之來至土喇一帶地方搶掠邊境之喀爾喀亦未可定今時會既佳馬復肥壯可調寧夏歸化城及右衛之兵循黑魯倫河於土喇等處往尋西卜顏哈灘巴圖魯探彼情形消息若果噶爾丹來近土喇擾害喀爾喀我軍有可乘之機將軍等相度而行

儻我師未至之先彼已過而前進則從後襲之趙良棟
諳習軍務郎談前往時可與之偕行令趙良棟率寧夏
火器營兵二百人寧夏兵即攜寧夏之米歸化城與右
衛之兵即攜湖灘河朔之米此時機會甚便斷不可失
爾等與領侍衛大臣議政大臣會議奏聞擒來之厄魯
特亦詳問之康熙三十三年七月初七日

諭戶部

盛京等處去歲禾稼不登粒食艱窘聞今年收穫亦未

豐稔米穀仍貴儻價值日漸翔涌則兵民生計恐致匱乏盛京等處地方關係緊要朕心時切軫念宜豫加籌畫作何恩給俾各資生著遣部院堂上官一員前往自甲兵以及匠役當差人等有力不能餬口者將人戶數目察明造冊具奏爾部即遵諭行特諭康熙三十三年七月十六日

諭內閣

今歲雨水通州以南新築之堤完固無恙惟東北舊堤

沖決數處此皆有關於民田迅速堅固修築為切要也
侍郎常書向曾遣閱視今仍令常書往詳看奏聞侍衛
亦令一二人偕往康熙三十三年九月十三日

諭戶部

朕惟黎元率育全恃農桑每遇歲時豐穰比屋皆能自
贍儻一經旱潦粒食無資即有俯仰不給之虞非相時
緩急而先事圖維則補助之恩難以徧沛頃巡歷邊外
道經密雲等處地方見田畝歉收米穀價貴閭閻匱乏

衣食不充目前既已艱難來歲何所倚賴宜豫為籌畫
用俾資生著遣部院堂上官二員會同直隸巡撫親詣
年歲不登之各州縣詳察明白應作何區處賑濟確議
具奏其八旗披甲當差及孤寡無依年老有疾中傷退
閒人等有實係貧窶窘於謀生者著各該都統詳察姓
名報部應作何恩恤爾部議奏著即遵諭行特諭康熙
三十三年九月十九日

諭大學士伊桑阿學士溫保戴通沈圖宋柱陶岱

侍郎席喇

朕觀四十九旗札克薩所設哨兵甚屬疎虞頃者厄魯特來使數百人至而哨兵全未知之是但有蒙古巡哨之名而無其實矣斥堠所關至重今天下承平無事八旗大臣無可勉効馳驅惟噶爾丹苟延旦夕之命或各旗大臣或部院大臣酌量遣往每旗派護軍十人人各給官馬二匹兩人共給駱駝一隻由歸化城攜米偕四十九旗設立哨兵大臣等來往巡察凡有動靜可以速

達無悞良有裨益且大臣等得以諳悉邊塞情形不亦善乎此安設巡哨之大臣及護軍以幾月一次更代爾等及八旗都統副都統滿九卿官員會同議奏康熙三十三年九月二十日

諭內閣

朕聞奉旨遣往各省大臣官員沿途文官朝服以迎之武官介冑以迎之此皆未當於理應行禁止爾等與九卿會議具奏康熙三十三年十月初六日

諭內閣

天下武舉會試者或其人材可用騎射亦優而以不合
式之故遺而不錄者有之朕意殊為憫惜令兵部宣示
有願効力與再試者具呈候該部請旨再行考試遴選
隨火器營令其服習戎事於會試時照常考校既晰知
其人亦便於拔取有超卓者即與錄用如此則人材不
致遺棄於考試良有裨益矣爾等會同九卿詳議奏聞
康熙三十三年十月初六日

諭大學士伊桑阿阿蘭泰

去歲發通州倉米每月以萬石平價糶賣大有濟於百姓今歲通州附近之地穀米稔收仍照去年每月以萬石令倉場侍郎親自閱視平價糶賣康熙三十三年十一月初九日

諭大學士伊桑阿阿蘭泰

密雲順義附近地方今年米穀未收出常平倉所貯米穀平價照常糶賣外朕所命轉運積貯之米每月發千

石平價糶之此事遣戶部賢能殷實司官各一員監視
糶賣康熙三十三年十一月初九日

諭內閣

去歲於直隸山東河南山西陝西江南諸省下詔捕蝗
諸郡國盡皆捕滅蝗不為災農田大獲惟鳳陽一郡未
能盡捕去歲雨水連縣今歲春時若或稍旱蝗所遺種
至復發生遂成災沴以困吾民未可知也凡事必豫防
而備之斯克有濟其下戶部速勅直隸山東河南山西

陝西江南諸巡撫準前制亟宜耕耨田畝令土瘠蝗種
母致成患若或田畝有不能盡耕者蝗始發生即力為
撲滅毋使滋蔓為災康熙三十四年正月二十六日

諭內閣

通州道路曾禁行車令於兩傍行今兩傍圯壞來往維
艱可弛其禁令於道中行車又京師大街之中亦令車
行毋禁康熙三十四年二月二十四日

諭內閣

朕昨幸五龍亭因往視火延燒處守巡官員兵丁盡皆
曠誤凡諸守視之地以有關繫始設官員兵丁若此怠
忽將來流弊其何底止可勅八旗滿洲蒙古漢軍都統
副都統等此後各於本旗官員兵丁守視處身往不時
巡察有曠誤者當叅奏則叅奏當咎責者則咎責之步
軍統領等巡察該管官員步兵之便其馬兵守視處竝
令巡察至於米倉所繫重要尤宜敬慎儻有疎虞守視
官員兵丁必戮無赦其下八旗都統副都統等遵行毋

急康熙三十四年二月二十四日

諭大學士伊桑阿阿蘭泰王熙張玉書學士溫保
戴通沈圖宋柱李枏顧藻陸某徐嘉炎

翰林官專委以文章之事撰擬文字外更無他務自是
以後凡碑文祭文其撰擬之姓名併奉有俞允之旨及
申飭之旨者皆書於冊三奉俞允之旨三奉申飭之旨
者具以聞康熙三十四年三月初二日

聖祖仁皇帝御製文第二集卷十三